

Pelan Pemulihan Negara

(25 Jun 2021) Berita Harian p.5

KL dijangka 'hidup' semula seawal Ogos

Usaha diperhebat capai imuniti kelompok bagi jayakan Pelan Pemulihan Negara

Oleh Suzalina Halid
suzalina@bh.com.my

Kuala Lumpur: Kuala Lumpur yang menjadi pusat ekonomi dan sosial negara dijangka kembali 'hidup' seawal Ogos ini.

Warga kota diyakini berupaya kembali kepada kehidupan normal lebih awal apabila imuniti kelompok di Wilayah Persekutuan dicapai dalam tempoh dua bulan lagi.

Menteri Wilayah Persekutuan, Tan Sri Annuar Musa, berkata sasaran sama juga dijangka dicapai bagi Putrajaya dan Labuan menjelang bulan depan dalam usaha menjayakan Pelan Pemulihan Negara (PPN).

Beliau berkata, dalam memastikan usaha itu tercapai, Kementerian Wilayah Persekutuan (KWP) melancarkan program bersifat pecutan melalui Program Vaksinasi Bergerak MyMedic@Wilayah, tambahan kepada Pusat Pemberian Vaksin (PPV).

Ia menyasar proses pemvaksinan di kawasan Program Perumahan Rakyat (PPR), Perumahan

Awam (PA) Dewan Bandaraya Kuala Lumpur (DBKL), kampung tradisi, industri, pasar borong dan penempatan gelandangan bagi memastikan tiada yang tercicir.

"Kuala Lumpur adalah pusat ekonomi yang merangsang pertumbuhan seluruh negara dan sangat penting untuk mencapai imuniti kelompok dengan cepat bagi memastikan semua aktiviti komersial dapat kembali beroperasi seperti biasa.

"Kita dapat melihat cahaya di hujung terowong dengan adanya Pelan Pemulihan Negara dalam pengurusan COVID-19 hingga akhir tahun ini.

"Apa yang saya harapkan ialah selepas Ogos ini, senarai negatif membabitkan sektor yang boleh



Perdana Menteri, Tan Sri Muhyiddin Yassin diiringi Annuar (kiri) beramah mesra dengan penduduk yang menerima vaksin sempena Program Imunisasi COVID-19 Mobile Vaccination di Pusat Vaksinasi Perumahan Awam Seri Johor, Kuala Lumpur baru-baru ini. (Foto Aswadi Alias /BH)

beroperasi akan berkurangan sehingga Kuala Lumpur dapat kembali hidup dan penduduknya boleh memiliki pendapatan seperti sedia kala," katanya pada sidang media khas mengenai PPN membabitkan Wilayah Persekutuan.

Beliau berkata, bagi kes COVID-19 di ibu negara, pihaknya berusaha dengan kementerian bertanggungjawab memastikan kadar kebolehhangkitan (Rt) menurun kepada 0.8.

"Sejak 7 Jun hingga Selasa lalu, kita berjaya memberikan 38,856

dos vaksin pertama di bawah MyMedic@Wilayah yang dilaksanakan di 14 PPR dan PA DBKL dan kampung tradisi selain di lapangan industri, termasuk pasar borong menggunakan 13 trak.

"KWP menyasar penambahan bilangan trak kepada 40 bagi program MyMedic@Wilayah dan mengadakan perbincangan strategik bersama Kementerian Sains, Teknologi dan Inovasi (MOSTI) dan Badan Bertindak Imunisasi COVID-19 (CITF) untuk penambahan vaksin kepada Labuan," katanya.

Liputan Imunisasi COVID-19 WP Kuala Lumpur & Putrajaya

Pusat pemberian vaksin (PPV) di WP KL & Putrajaya

WP Kuala Lumpur	
JENIS PPV	BIL PPV
PPV Mega	2
PPV Awam	1
PPV Mobile	13
SPPV	3
PPVGP (Klinik Swasta)	90
PPVHS (Hospital Swasta)	13
PPVAS (Awam Swasta)	2
JUMLAH	124

WP Putrajaya	
JENIS PPV	BIL PPV
PPV Awam	1
PPV Mobile	1
SPPV	2
JUMLAH	4

Jumlah keseluruhan PPV = 128

Peratus liputan imunisasi COVID-19: Sehingga 20 Jun 2021

WP	Jumlah kumulatif divaksinasi Dos 1	% divaksinasi Dos 1 mengikut populasi	Jumlah kumulatif divaksinasi Dos 2	% divaksinasi Dos 2 mengikut populasi
Kuala Lumpur	724,684	53.74%	141,094	10.46%
Putrajaya	33,272	49.15%	20,073	29.65%

Sumber: <https://www.vaksinacovid.gov.my/>



PEMERKASA+ WILAYAH PERSEKUTUAN PRIHATIN

10% REBAT
Cukai taksiran
DBKL 2021
di WP Kuala Lumpur

• 666 Hotel

• 93 Pusat beli-belah
(Kategori tidak berstrata & tidak mendapat elaun kosong)

RM14.3 JUTA

Pengecualian hasil kepada DBKL

10% REBAT
Cukai taksiran
PPJ 2021
di WP Putrajaya

• Bangunan-bangunan komersial dan perindustrian

RM1.51 JUTA

Pengecualian hasil kepada PPJ

Pengecualian penalti denda lewat cukai taksiran tertunggak tahun 2020 & 2021

• Unit kediaman, premis komersial dan perindustrian di WP Kuala Lumpur, Putrajaya dan Labuan